



24. august 2021

Inatsisartut suleriaasianni § 37 imm. 1 malillugu matumuuna Naalakkersuisut ukuninnga apeqquteqaateqarpunga:

Naalakkersuisunut apeqquteqaatit:

- 1. Naalakkersuisup sorliup akisussaaffigaa inuiaqatigiit paasissutissiiffigissallugit, ilaatigut pineqarput kalaallit inuusuttut, illersornissap iluani ilinniarnissaminnik kissaateqartut, Danmarkimi sakkutuunngornissamut misilitsinnermut aningaasartuutitut akiliunneqarsinnaanersut?**
 - a. Sorleq eqqortuua: sunngu.gl-imi allassimasoq, soorlu Nunanut allanut Naalakkersuisoq akissuminni tunngavigigaa¹ imaluunniit, Ilinniartitaanermut Naalakkersuisup inatsit tunngavigineqartoq pillugu akissummini nassuiaataa?²
 - b. Naalakkersuisut isumaqarpat sakkutuunngornissamut misilitsinnernut aningaasartuutit matussuserneqaarnissaat sunngumi allassimasut inatsimmilu allassimasut ataqatigiittut? Akissut tunngavilersoqquneqarpoq.

- 2. Siunissami illersornissamut suleriesissaq aammalu issittumi ilinniartitaaneq pillugu Naalakkersuisut Inatsisartut tamarmiusut Ukiaanerani ataatsimiinnermi 2021 oqallisigineqassasoq pilersaarutigivaat?**

- 3. Naalakkersuisut sakkulersorfiunngitsup pitsaaqutai ajoqutaalu suut taakkartorsinnaavaat?**
 - a. Siunissami Kalaallit Nunaata namminersortuunerminik naqissusiinissaa Naalakkersuisut qanoq takorloorpaat?
 - b. Nunaqavissut illersornissamut ilinniartitaanernut periarfissinneqarnissaat, taamaaliornermikkut kalaallit nunaata imartaanik innuttaanillu illersueqataanissaat, qanoq Naalakkersuisut takorloorpaat?

(Inatsisartunut ilaasortaq Anna Wangenheim, Demokraatit)

Tunngavilersuut

Aasap ingerlanerani arlalitsigut § 37 aqutigalugu Illersornissamut aammalu tassani ilinniartitaanernut apeqquteqaateqartoqarpoq. Nunanut Allanut Naalakkersuisoq Kultureqarnermut- ilinniartitaanermullu Naalakkersuisumut innersuussivoq³. Ajuusaarnaraluartumilli paasisaqarfiunngitsumik. Tassami sulii imaappoq, sulii ersarissumik akissuteqarfigineqanngimmat, inuusuttut suna naatsorsuutigissaneraat. Nittartakkami www.sunngu.gl –imi takusassaavoq, illersornissap iluani ilinniassagaanni aningaasartuutit matussuserneqarsinnaasut.

¹ https://ina.gl/documents/para3637/2021/svar/070_2021_udenrigs_forsvar_ANWA_svar.pdf

² https://ina.gl/documents/para3637/2021/svar/085_2021_vaernepligt_ANWA_svar.pdf

³ https://ina.gl/documents/para3637/2021/svar/070_2021_udenrigs_forsvar_ANWA_svar.pdf



Taamatullu ilinniartitaanermut Naalakkersuisup nassuiarpaa, Danmarkimut ilinniariarnermi akiliunneqarnissaq periarfissaanngitsoq, Nunatsinni ilinniartitaaneq pilerinartinneqanngimmat. Ila sunami inuusuttut malissagamikku?

Isumaqarpunga, tunngaviatigut tamanna kukkunerujussuusoq, tassami siusinnerusukkut periarfissaasimammat. Taamaassimavoq Naalakkersuit Danmarkimi Illersornissamut ministeriaqarfik piumaffigimmagu sakkutuunngorniarnissamut misilitsinnerit unitsinneqassasut aammalu issittumi piginnaasanik annertusaanermut isumaqatigiissutit allat unitsinneqassasut.

Namminersortuunermi naqissusiinermi ilaatigut malittaapput pingaartumik Kalaallit Nunaata, imartaata illersornissaa aammalu kalaallit immami isumannaatsumik angalanissaata illersornissaat. Taamatuttaaq naqissusiinissamut iluatinnaatilimmik iluaqutaasinnaasoq paasineqarpoq, umiarsuarni kalaallinik inuttaqartarnera, iliuutsinilu allani kalaallit inuttaasut akornanni kulturikkut oqaatsitigullu iluaqutaasarsimanerat.

Taamaattumik isumaqarluinnarpunga, naleqqatigigaa, siunissami kalaallisut ilinniakkamik piorsaanissaq, siunissami Kalaallit Nunaat taakkuninnga ingerlatsisinnaanngorlugu, partiit amerlanerpaat Kalaallit Nunaat namminersortoq kissaatigimmassuk. Naalakkersuisut issiasut nunatsinni namminersulivinnissamik suaartaatiginninnerpaanik ilaqarput taamaammat eqqarsarnartoqartippara, illersornissamut tunngassutilinnik ilinniakkanik annertusaarusunnginnerat. Tamanna paasiuminaalluinnarpoq.

Isumaqarpunga ilinniartitaaneq siunissami aqutissaasoq, ilinniakkallu tamarmik Kalaallit Nunaat kalaallillu pisuujunerulersissagaat. Tassunga atatillugu paasiuminaalluinnarpoq, maanna Naalakkersuisuusut tamanna pillugu tusagassiutititut innuttaasunullu ammasumik paasissutissiisinnaanginnerat. Taamaammat taamatut aperisariaqarpunga, Naalakkersuisut suliamut ammasumik ersarissumillu oqaaseqaqqullugit.

Apeqquteqaatima ullut suliffiusut qulit iluanni akissuteqarfigineqarnissaat kissaatigaara.